

江鄂縣新志初稿

民國廿六年  
馬鎮邦題



人物傳第五目錄

張鶴第

李曾麟

楊 耀

王順齡

錢祥保

凌鴻壽

王贊臣

王昌年

趙柏齡

徐聯芳

周寶璠

鮑亮宣

朱德恆

目錄

人物傳

人物傳第五

江都縣新志卷十

張鶴第字雲門世居邵伯鎮爲士族少負才名嘗與鎮人薛一諤等結文社名曰賞奇所刊文至一時傳誦年十九補諸生光緒丁酉舉順天鄉試以家貧友教四方廣交游因識河閒馮公於未遇時及馮公官軍諮使召鶴第入都掌書記未久聞父病歸會江甯學務公所設立使者耳其名羅致之鶴第意不樂曹司乃出爲兩淮中學監督改國後馮公繼張勳督師江蘇鶴弟往依焉馮公爲總統欲官之鶴第不可乃待以上賓往來南北一歲數四鶴第豪邁有辯才抵掌談時事聽者動色京師諸貴人及南中大府皆爭交之問遺不絕以故橐中裝常滿所居逆旅賓客闐其門鶴第無所擇皆善遇之性素慷慨有所求未嘗不應其後馮公引退時局再變鶴第亦垂垂欲老三致千金隨手輒散而所識窮乏猶倚之爲孟嘗遂鬱鬱邁疾卒卒後家無餘財唯書畫充屋廬本居泰半皆十餘年來貧士持此求售而鶴第故收之者也年甫五十時論惜之

楊燿字炳炎元籍寶應少饑貧奔走衣食北胡南越嘗隻身行萬里久之境漸裕晚乃居郡城買田宅爲富人而不忘艱苦篤故舊下至所識窮乏亦量力周卹之尤

禮敬賢士性豪邁酒酣以往肝膽畢露暉暉照人抵掌  
談西北地理及同光閒征捻征回用兵始末皆歷歷如  
繪聽者忘倦廣交游識徐上將寶山於微時寶山重其  
人所言無不聽辛壬之閒寶山駐軍揚州專生殺燿與  
吳策左右之俾威不傷恩軍心以固而地方亦獲按堵  
其部下假權勢橫行者輒言於寶山裁制之不容恣威  
福綱紀肅然揚人至今深德寶山燿與吳策之力爲多  
焉寶山歿後邦人士於湖上建園祀寶山其中初董其  
役者吳策策卒燿繼之值盛暑往來烈日中時燿年近  
七十不憚勞苦逾年園成復於紅橋西沿隄植柳數百

卷十

人物傳

二

株以達於園中建一亭爲游人休息之所今所植之樹  
皆扶疏垂蔭春夏閒白紅橋以東遙望之儼若圖畫而  
惜乎燿之不及見也年七十有三卒卒後平生所藏書  
畫珍玩甚夥曾不數年遂皆流落人閒云

錢祥保字瑞生號訥庵父唐見前志祥保少工制舉文  
及詞賦兼善小楷書困於童子試年二十餘始以經古  
第一補諸生又八年而食廩餼名亦第一屢應布政司  
試未售乃入資以知縣分發河南初署理武安武安居  
河北民風素樸祥保勤於任事而人亦奉其教令以故  
治甚有聲大府器其才調署唐縣唐屬南陽稱煩劇俗

健訟吏役相朋比持官短長祥保一斷以法無所顧畏  
初至薦紳有投函關說者祥保揭其書署門其人慙且  
恨嚴懲蠹役革除各班老總名目而責成卯首復裁汰  
捕班及四鄉路捕立石縣庭永垂厲禁於是唐之良民  
獲蘇而地方訟師土豪倚爲姦者大有所不便銜之  
甚深憚莫敢發逮祥保補授上蔡移官去乃摭他故賄  
言官誣劾之因絀吏議祥保罷歸後未久武漢事起里  
居者數年丁巳春復用湖北巡按使段書雲薦以縣知  
事仍分河南未一月遽謝歸自此遂不復出祥保性剛  
不能容物好盡言時面斥人短而不餘受者地其被劾

去官及居鄉不爲人所喜以此然平生勇於自任爲人  
謀亦甚忠湯火在前蹈之不避往往有人所難能者積  
頻年俸餘買田宅自奉儉約不改寒素而周旋親舊禮  
意未嘗不隆歲時具尊酒爲驩會而綈袍之贈時密致  
之唯恐人知也乙丑秋旱西鄉被災甚者至赤地有司  
者惑人言不以上聞翌年春民無食垂死祥保力爭得  
振全活甚眾江都甘泉兩縣志書修於光緒初歷四十  
年中更滄桑之變祥保懼久而事迹湮沒乃倡議續修  
設局旌忠寺文選樓下延同縣桂邦傑興化郭鍾琦主  
編纂事而已則籌募經費奔走呼籲備歷艱苦鄉邑文

獻賴以不墜非其好事莫肯爲也閱七年成書而祥保遽卒年六十有四卒後數年其與爲窮交者咸思念不置而當時不嫌於祥保者亦以爲無復有斯人云

王贊臣以字行世居瓜洲祖德華咸豐閒死難人欽其義烈父惠義以篤行稱兩世並見前志贊臣兄弟六人於次居五少讀書通大義以不屑科舉業棄去任俠自喜嗜義若飢渴急人之難切於在已生平足跡所至輒與其賢豪長者交四十後歸自嶺南設逆旅於金陵下關四方賓至車馬填咽其與爲舊故而貧乏者過其地贊臣餉以酒食推大牀臥客不責其償或更助之資斧

卷十

人物傳

四

焉泰西善士於兩軍交戰時任裹創掩骼一切救濟事者用紅十字爲幟因爲其會名近又有紅卍字會名異而實同者也吾國好善不後泰西因放行之甲子秋蘇浙事起贊臣時居金陵主紅卍字會事親率隊往崑山瀏河閒出入鋒鏑兩月有奇越二年丙寅秋武漢變復作贊臣倉卒偕四十八人赴九江時商舶不通乃附運軍火船以行船滿貯彈藥九月初十日夜將邸岸忽火起贊臣居最上層有善泅者數人將挾之下贊臣不可急麾以肱曰去去速自計無顧我俄而火爆作聲如雷光上燭天江水爲赤於是全船俱燼從者四十八人獲

生者九贊臣與一子並罹於難後十三日始得其尸遠近聞者莫不哀之贊臣嘗爲江蘇省議會議員復被選爲國會議員隸眾議院以簡任職存記歿時年四十七子六人第四子瑤字宏羣與贊臣同殉

趙柏齡字亮儕世居邵伯鎮相承詩禮爲儒門柏齡少謹厚無子弟過劬於學工制舉文弱冠補諸生有聲庠序光緒壬寅舉於鄉時年三十餘矣兩應禮部試未售丁未會考黜居三等時京師初設郵傳部帖寫須人尙書陳璧奏請設八品錄事如筆帖式招落第舉人考充柏齡以歸無所事乃強就在職三年以勞晉七品小京

卷十

人物傳

五

官辛亥秋武漢變作警耗傳京師不數日閒各部曹司幾爲一空柏齡仍日趨直如故明年春京師兵變是夜適柏齡輪直守不去人笑其愚而大爲次長葉公綽所器郵傳部易名交通柏齡改官主事會僉事闕員將擢用之而柏齡忽得疾神恹怳而語蹇難狀若癡以故不果遷柏齡病久不愈前後長部者憐其貧老悉優容之凡十餘年南望故鄉不得歸妻帑嗷嗷仰微俸以活猶日趨曹支離擁腫於少年新進閒意不能堪而無如何也以丙寅冬卒年五十有八平生篤於朋友與同縣陳懋森爲兄弟交甲寅冬懋森應官河南將出都時風雪

天寒柏齡與桂邦傑製羊裘一襲贈之兩人皆貧士所費至數十金其風誼蓋不讓古人也柏齡卒後明年南中兵起客其喪京師久之乃克返葬

徐聯芳字萼樓弱冠補諸生旋食廩餼有文章名中年以例貢太學入資爲儒官選授沭陽訓導沭陽俗强悍聯芳以經術訓士子教之禮讓多化之者丁母憂歸自此遂不復出教授鄉里成就弟子甚眾平生言行不苟有古君子風以戊辰 月卒年七十有三

周寶鑿字芷生少劬於學工制舉文逾冠補諸生久困場屋年幾四十光緒壬寅始舉於鄉兩應禮部試未售

卷十

人物傳

六

庚戌會考復被黜時大理寺改院未久正卿定成援郵傳部例奏設八品錄事招是年落第舉人及優拔貢考充寶鑿列正取名稍後未卽傳補明年春聞妻喪歸及秋而武漢事起寶鑿故寒素自入學後或課徒於鄉或客授於外寒氈破硯攜以自隨中年雖登賢書而訖無所遇及遭國變侘傺益甚性不諧俗終歲戚戚常無歡顏少而嗜飲兼善弈五十後乃一於酒擊柝在手藉以自遣而有時悲從中來聲與淚俱卒莫能明其故也寶鑿厭世惡濁而人亦憚其孤介其久與游處皆貧士無聊而性復相近者持廉太過遂鄰於矯晚歲有子能養



而意殊不樂以己巳冬卒年六十有六鄉之人許爲狷士而惜其古道之不行於今也子二人啟賢崇賢並克世其家而啟賢尤稱孝謹云

鮑亮宣字春圃先世安徽歙縣人高祖志道乾嘉閒業鹺揚州爲商總以慷慨好義名一時世所稱誠一封翁者也自此代居揚州而應舉仍籍歙縣亮宣生三歲而孤母吳撫教之比長從名宿游益自淬厲逾冠以第一補諸生困於場屋年四十光緒辛卯應江南鄉試同考官葛祥熊賞其文以魁薦主試者抑置副榜人咸惜之亮宣亦遂絕意進取家居數十年安貧守道充然有以

卷十

人物傳

七

自得也事母至孝居恆未嘗離親側偶省舅氏於東流而母忽邁疾卒於家亮宣奔喪歸攀棺長號哀慟幾絕晝夜衰服居苦次時年逾始衰春寒家人強以裘進堅拒之自以不及視含殮茹恨終其身語及輒流涕與弟曙生友愛甚篤弟蚤世撫弟之子女如己出焉爲人簡靜沖澹於人世富貴利達之境泊然無所動於中應事接物純任自然靡有矯飾生平不治家人生產出入有無一不以厝意親故以緩急踵門必副所期無吝辭無德色其於學也涉覽羣書欣然有會未嘗沾沾於訓詁章句不喜釋老家言亦不取有宋五子之說嘗曰宋儒

之學名異於佛實則陰竊其說而文以聖賢之言非孔門之真傳也爲文作書亦不規規於前人而天機清妙自與古合旁逮醫方音律卜筮星曆之術靡不該貫而未嘗以一藝名善養生年逾七十兩鬢未班腰腳猶健日與諸老友爲茗會或徜徉衢市中貌清臞而意閒暇見者以爲神仙中人也以己巳季冬感微疾卒年七十有九子二人奎庚並稱賢孝

朱德恆字子貞世居東鄉朱家火爲著姓德恆年二十補諸生以不工干祿之書應舉之文與時左而竊慕古人義俠之行喜爲不平之鳴自少至老居鄉數十年往

往爲人所不敢爲不肯爲而成敗利鈍則非所及計也有清之季綱紀漸弛官吏因緣爲姦德恆以縣倉積穀歲久弊滋合地方父老公呈大府請清查奔走呼籲越二年始得請辛亥秋江水暴漲濱江八港岸崩壞田廬德恆募集乾餼以食餓者請官帑立塞決口被災之民旋復業未幾武漢事起羣不軌之徒聞風而興剽略閭里德恆率鄉民爲官兵導躬入匪巢搜捕無遺又本縣釐卡設立重疊患苦商民德恆力爭去其不當立者自番舶行駛內河鼓輪激浪易損圩岸夏秋盛漲尤可危濱河居民以身家所寄起相抗莫能得德恆爲與外商

訂立水識屆則改用牽歲以爲常揚由關監督某倚武人勢違法橫徵人莫敢言德恆獨不畏強禦爲騰書白其罪狀某雖暴亢然無如何也德恆三被選爲江蘇省議會議員軍興以來煩費無藝一切取之於民朝下一令暮更一制竭澤之漁嗟歎盈路德恆居議席爲民請命持論侃侃雖明知勢不可回而攘臂以爭必至再至三而後已江南北學校風尚戊己以後益趨浮囂主其事者方張甚莫之敢撓德恆力詆其非於稠人廣眾中而尤以壞男女之大防爲必不可痛心疾首聲淚俱下當時獨倡無和或匿笑其旁而德恆夷然不顧也德恆

家世素封少承先業不善治生產性復慷慨時緩急人自居議席前後十餘年膏腴之割且盡逮老而窮人以是爲德恆惜然當辛酉冬省議會以奪機工生計激眾怒闖入議場遇者輒受重創德恆適在有識者急呼曰此揚州朱某好人也相戒勿犯方烏合之眾奮不顧身之時而能以好人獲免由此觀之德恆固可無悔而好人又何嘗不可爲也丁卯東南再變歸隱於家以庚午二月卒年七十有一鄉人私諡勤介先生

李曾麟字振青父端詩篤行君子甫中年侘傺以卒曾麟十六而孤家貧甚母蕭挈之依外家以居者數年自

幼恂恂無子弟過劬於學蕭有賢行教子以禮法令從名師游學益進及冠補諸生越三年光緒戊子舉於鄉五應禮部試未售居鄉教授者前後十餘年年三十七入資以知縣分發湖北曾麟素勤慎初宰建始甚有聲大府以其才足任繁劇乃委權漢陽復調江夏列上考得傳旨嘉獎真除長樂擢施南府同知並留不遣累保升用知府在任以道員候選加二品銜辛亥變作棄官歸里居二年癸丑冬泰縣韓國鈞長江蘇適寶應匪氛甚熾其地之士夫請以曾麟署知事韓允其請曾麟辭不獲蒞任後捕劇盜數人地方以安明年河西旱災曾

麟籌振有勞以部令回避本省改官浙江居浙數年嘗權釐杭縣長省署祕書復之山東又入都歷內務農商兩部祕書辛酉冬聞母病乞歸明年母歿時曾麟年五十七自此遂不復出曾麟少孤露備嘗艱苦後雖仕宦不忘寒素常儉於己而豐於人晚年營鹺業於鄉昕夕勞瘁人或勸其少休曾麟歎曰吾一寒士幸獲溫飽若僅自爲計閉門可矣唯環顧戚族與友朋之交深者枯槁皆是思有以潤之而力不逮故甯苦吾身以爲人役每念衰老非不自惜然豈得已哉曾麟事母至孝嘗依外家及貴賤贈外王父母如其官與兄光第白首怡怡

姊適金妹適殷終身視之一如在室以庚午十一月卒年六十有五卒之日其親故咸哭失聲而道路之人亦多歎息不置云

王順齡字志新幼孤咸豐初東南之亂年十歲郡城陷與母相失後被挾至金陵久之乃克歸里骨肉重完人以爲先世積善之報云順齡時年逾二十習貨殖於米肆者數年因精計學年三十乃自設肆以誠信爲眾所歸由是業隆隆起中歲後兼設油肆貿易益廣遂稱巨商順齡以幼遭離亂薦更百苦於人世艱難險阻知之甚深迨處境漸豐不忘疇昔因推己及人於親故急難

鄰里之顛連無告者必竭力周卹之一方道路頗則平治凡修建橋梁十餘所費巨貲不惜其關全縣荒政若平糶振災主其事者亦多要順齡相助以故一鄉推爲善人而順齡飲食服御不改其初視貧約時無少異也順齡少而習勤至老不怠未明而起理肆中事家庭瑣屑亦躬親之年逾八十神明不衰唯自辛亥而後卽不復入城市而以用世勗其子敬庭敬庭負幹濟才長江都商會於今八年當丁卯春及秋南北更代之際縣無官嘗兩攝縣事時軍旅駱驛地方供億滋繁因應失宜變且不測卒之按堵如故莫不推敬庭之功由奉教於

順齡者深也年九十以壬申九月卒鄉之人同聲悼惜以爲斯人之亡而醇樸之風將不可復見也子一敬庭凌鴻壽字仁山晚號鈍叟世居仙女廟鎮年十三補諸生十五以經古合屬第一食廩餼以此才名傾一時而屢應鄉舉不售或瀕得而失年幾四十始以例貢太學注選訓導又十餘年而入資爲通判分發廣東訖未之官而鴻壽老矣清末江蘇設諮議局鄉人以鴻壽應選改國後復被舉爲國會議員隸眾議院嘗一之廣東再之京師又嘗代理議長方曹錕謀爲總統聞鴻壽於議員中齒最長因遣人之旅邸密致意壽以萬金時鴻壽方患貧宜可以爲晚計乃峻拒不受人多怪之迨其後國勢一變而名以賄敗者凡若干人然後知鴻壽權乎輕重斷之於心之爲無悔也鴻壽家本素封以性忼慨時緩急人遂罄所有中歲以後乃不得不義取於人然所得隨手輒散未嘗少留歸自京師年七十許矣嘗望外得巨金鴻壽於所識窮乏裁取爲贈不兩月而盡遂仍無以卒歲鴻壽雖家於鄉而一歲之中城居者太半其蹤跡常在逆旅中時具酒食召故舊爲樂皤然老翁偃偻周旋唯恐禮之不恭情之不至也接物以和與人言常啍啍雖至販夫走卒不忍傷之獨於其鄉爲富不

仁者語及輒奮髯抵几痛斥其非蓋鴻壽以長者之心慨然於窮民之無告而非有憾於其人也以壬申十月卒年八十子一樹聲

王昌年字星巖父保性敦篤人目爲古君子昌年幼恂恂無子弟過讀書里塾已畢五經矣以父命改習貨殖數年肆燬於火因歸仍治舉業光緒戊子以合屬經古第三補諸生旋食廩餼丁酉陪取選拔貢生時風氣尙閉固昌年獨明算術通習時務於諸生中頗有聲屢應布政司試未售遂援例貢太學會罷科舉設學堂昌年就所居創辦小學日時敏甘泉知縣白承頤視爲有效

卷十

人物傳

十二

因改爲官立西區學堂其後江甘高等小學設立邦人士遂舉昌年爲堂長焉昌年視學堂如其家視學生與家塾弟子同一將以誠意無虛僞凡在職三年有奇先後學使者視察揚州咸列上考改國後於本邑及鹽城佐縣治時地方殷富鄉民於新政瞢無知士夫與官相朋比假其名往往致富昌年則廉介自守不妄取一錢友人劉豫瑤官湖北高等檢察廳長招之往以宜昌分廳書記官長屬之簿書填委昌年昕夕勞瘁於乙卯秋得中風之疾而歸自此遂蹒跚而行右臂偏廢而動作以左然神明未衰與常人無異凡家居十有九年平生

和易遇人猥猥而澹於名利一切無所爭有犯之者嘿不與校以長者稱方少負文章名人或期以遠大乃不幸以諸生老然與昌年同時而科名仕宦擁鉅貲歸者率勞苦沒世子孫陵夷昌年則閉門養疴優游晚歲諸子賢孝以興其家說者謂爲忠厚之報云以甲戌五月卒年七十有一子恩棠恩官恩良恩嘉竝知名於時孫十二人

陳懋森編纂

卷十

人物傳

十四



